



## Մ Ա Յ Ր Ա Թ Ո Ռ Ո Ւ Մ

### Դեկտեմբերի 2-ին, կիրակի.—Բ կիրակի Յիսնակաց.

Այսօր Մայր տաճարում ս. պատարագ է մատուցում վրահայոց թեմի առաջնորդ տ. Գևորգ եպս. Սերադարյանը:

Ս. պատարագից հետո, Վեհափառ Հայրապետի նախագահությամբ, տեղի է ունենում կառավարական մաղթանք՝ նվիրված Հայաստանի խորհրդայնացման 53-րդ տարեդարձին: Հայ ժողովրդի մեծ տոնի առիթով հայրենասիրական ջերմ խոսքով հանդես է գալիս Մայր տաճարի լուսարարապետ տ. Հուսիկ եպս. Սանթրույանը՝ վեր հանելով անցնող 53 տարիների ընթացքում հայ ժողովրդի արձանագրած հոգևոր, մշակութային, գիտական, տնտեսական մեծ նվաճումները, բարեմաղթում էլ ավելի բարօրություն և խաղաղություն վերածնված Հայոց աշխարհին՝ սովետական եղբայրական ժողովուրդների մեծ ընտանիքում:

### Դեկտեմբերի 9-ին, կիրակի.—Գ կիրակի Յիսնակաց. Յիդութին սուրբ Աստուածածնի յԱննայէ.

Այսօր Մայր տաճարում ս. պատարագ է մատուցում տ. Եզնիկ արք. Պետրոսյանը և «Հայր մեր»-ից առաջ քարոզում «Ես կերակուր ունիմ ուտել, գոր դուքն ոչ գիտեք» (Հովհ. Դ 32) բնաբանով:

Դեկտեմբերի 11-ին, երեքշաբթի.—Այսօր Մայր Աթոռ են այցելում՝ Երևանում բացված և տուրիզմին նվիրված ամերիկյան ցուցահանդեսի կազմակերպիչները:

Մայր տաճարում նրանց դիմավորում է լուսարարապետ տ. Հուսիկ եպս. Սանթրույանը և ծանոթացնում տաճարի պատմությանը: Այնուհետև հյուրերը դիտում են Մայր տաճարի եկեղեցական արվեստի թանգարանը, Հին Վեհարանը:

Վերջում հյուրերին բարեհաճում է ընդունել Ամենայն Հայոց Վեհափառ Հայրապետը և ջերմ զրույց ունենում նրանց հետ: Հյուրերն աջահամբույրով ստանում են Հայոց Հայրապետի օրհնությունները:

Նույն օրը, ժամը 19-ին, Երևանում, հայրապետական վիլայում, Վեհափառ Հայրապետի նախագահությամբ, տեղի է ունենում Գերագույն հոգևոր խորհրդի հերթական նիստը:

Դեկտեմբերի 14-ին, ուրբաթ.—Այսօր, երեկոյան ժամը 18-ին, Վեհարանում, Վեհափառ Հայրապետի նախագահությամբ,

գումարվում է Գերագույն հոգևոր խորհրդի հերթական նիստը:

\* \*

### **Դեկտեմբերի 16-ին, կիրակի.—Դ կիրակի Յիսնակաց.**

Այսօր Մայր տաճարում ս. պատարագ է մատուցում տ. Արիս ծ. վրդ. Ծիրվանյանը և «Հայր մեր»-ից առաջ քարոզում ս. Հակոբ Մծբնա Հայրապետի կյանքի և գործի մասին՝ «Ցաղթող և սուրբ Հայրապետ, նրան մեծին Մովսէսի» (Ծարական) բնաբանով:

Ս. պատարագին ներկա է լինում Վեհափառ Հայրապետը:

\* \*

**Դեկտեմբերի 20-ին, հինգշաբթի.**—Այսօր հոգևոր ճեմարանում սկսվում են կիսամյա քննությունները, որոնք կտևեն մինչև դեկտեմբերի 29-ը:

\* \*

### **Դեկտեմբերի 23-ին, կիրակի.—Ե կիրակի Յիսնակաց.**

Այսօր Մայր տաճարում ս. պատարագ է մատուցում տ. Աղան վրդ. Բալիոզյանը:

Ս. պատարագից հետո, Վեհափառ Հայրապետի նախագահությամբ, տեղի է ունենում հոգեհանգստյան պաշտոն՝ ի հիշատակ արգենտինաբնակ հաճնցի հայ ականավոր լրագրող և հասարակական գործիչ Աբրահամ Գրաճյանի:

Հանգուցյալը մայր հայրենիք կատարած իր երկրորդ այցելությունից հետո Արգենտինա վերադառնալու ճանապարհին սույն թվականի նոյեմբերի 5-ին Մոսկվայում կրնքեց իր մահկանացուն: Հանգուցյալի մարմինը բերվեց մայր հայրենիք և ամփոփվեց Նոր Հաճնում: Թաղման արարողությունը կատարվում է Արարատյան թեմի առաջնորդական փոխանորդ տ. Կոմիտաս արքեպ. Տեր-Ստեփանյանի նախագահությամբ: Տ. Կոմիտաս արքեպանն իր դամբանական խոսքի մեջ վեր է հանում հանգուցյալի հայրենանվեր գործունեությունը:

\* \*

**Դեկտեմբերի 25-ին, երեքշաբթի.**—Սրբոյն Ստեփաննոսի նախավկային և առաջին մարտիրոսին:

Այսօր Մայր Աթոռի սարկավագների տոնն է: Մայր տաճարում ս. պատարագ է մատուցում տ. Արիս ծ. վրդ. Ծիրվանյանը: Ս.

պատարագի ընթացքում Մայր տաճարի լուսարարապետ տ. Հուսիկ եպս. Սանթրոքյանը սարկավագ է ձեռնադրում Աղվան կիսասարկավագ Գասպարյանին, որը պատրաստվում է կուսակրոն քահանայության, բեյրութաբնակ Մանուկ Թեգրյանին, որը պատրաստվում է ամուսնացյալ քահանայության, և հոգևոր ճեմարանի նախկին սան Մնացական Մոլիկյանին, որը որպես սարկավագ ծառայելու է Ռոստովի հայոց եկեղեցում:

Ձեռնադրությունից հետո ս. Ստեփանոս նախավկայի հիշատակին նվիրված ոգևորիչ քարոզ է խոսում պատարագիչ հայր սուրբը:

Պատարագից հետո լուսարարապետ արքեպան հոր և հոգևոր ճեմարանի տեսուչ տ. Արիս ծ. վրդ. Ծիրվանյանի առաջնորդությամբ Մայր Աթոռի բոլոր սարկավագները իրենց տոնի առիթով Վեհարանում աջահամբույրով ստանում են Վեհափառ Հայրապետի օրհնությունները:

Կեսօրին հոգևոր ճեմարանի սեղանատանը տրվում է ճաշկերույթ՝ ի պատիվ Մայր Աթոռի սարկավագների:

Սարկավագների տոնը շնորհավորում են տ. Հովհաննես քհն. Մարտիրյանը, «Էջմիածին» ամսագրի խմբագիր և հոգևոր ճեմարանի ավագ դասախոս Ա. Հատիսյանը, հոգևոր ճեմարանի եկեղեցական երաժշտության դասատու Հայկ Ֆրունջյանը:

Ծնորհակալության և երախտագիտության ջերմ խոսքեր ասացին Վեհափառ Հայրապետին, Մայր Աթոռի միաբանությանը, դասախոսական կազմին ուղղված հոգևոր ճեմարանի ավագ վերակացու Սարգիս արկ. Սարգսյանը, Վաչե արկ. Նալբանդյանը և Մանուկ արկ. Թեգրյանը:

Ընդունելությունը փակվեց տեսուչ հայր սուրբի օրհնությամբ:

\* \*

**Դեկտեմբերի 27-ին, հինգշաբթի.**—Այսօր, առավոտյան, Մայր Աթոռ այցելեց մեծանուն կոմպոզիտոր Արամ Խաչատրյանը, որն իր ծննդյան 70-ամյակի առթիվ կազմակերպված հանդիսություններին մասնակցելու և Հայֆիլհարմոնիայի համերգային մեծ դահլիճում հոբելյանական-հեղինակային համերգներ ղեկավարելու համար Մոսկվայից ժամանել էր Երևան՝ իր հարգելի տիկնոջ՝ կոմպոզիտոր Նինա Մակարովայի և աշխարհահռչակ թավջութակահար Մստիսլավ Ռոստրոպովիչի հետ:

Հյուրերին Մայր տաճարի դռանը ընդունեց լուսարարապետ տ. Հուսիկ եպս. Սանթրոքյանը և նրանց ծանոթացրեց Մայր տա-

նարի պատմությանն ու եկեղեցական արվեստի թանգարանին:

Այնուհետև հյուրերին ընդունեց Վեհափառ Հայրապետը, բարի գալուստ մաղթեց բոլորին և շնորհավորական ու օրհնության խոսք ասաց հոբելյար կոմպոզիտորին՝ բարեմաղթելով, որ Արամ Խաչատրյանը շարունակի ստեղծագործել երիտասարդական խանդավառությամբ, նորանոր ու անմահ էջեր ավելացնելով ոչ միայն հայ, ազգային երգարվեստի, այլ նաև համաշխարհային երաժշտության գանձարանում:

Այնուհետև շնորհակալության և երախտագիտության անկեղծ խոսք ասաց մեծանուն հոբելյարը՝ Հայոց Հայրապետին ուղղված այս ջերմ ընդունելության և հայրապետական սրտագին խոսքերի համար՝ շեշտելով, որ «ինչ ստեղծել եմ և դեռ կստեղծեմ, ինձ համար ոգեշնչման աղբյուր է հան-

դիսացել մեր ժողովրդի աննկուն ոգին, նրա վառ հավատը և նրա սերն ու երազանքները»:

Սույն սրտատույզ հանդիպման վերջում Վեհաբանի հանդիսությանց շքեղ դահլիճում, ի պատիվ Հայոց Հայրապետի և հոբելյար կոմպոզիտոր Արամ Խաչատրյանի, թավջութակահար Մստիսլավ Ռոտորուպովիչը մեծ արվեստով կատարում է Բախի «Սարապանդա», «Մեմուետ», «ժիգա» և «Ֆուգա» ստեղծագործությունները՝ արժանանալով Հայոց Հայրապետի բարձր գնահատությանն ու օրհնությանը և բոլոր ներկաների սրտագին ծափողջույններին:

\* \*

**Դեկտեմբերի 30-ին, կիրակի.**—Այսօր Մայր տաճարում ս. պատարագ է մատուցում տ. Անանիա վրդ. Արաբաջյանը:

